

20/01/1998

IMF hanya beri nasihat

SEPANG, Isnin - Tabung Mata Wang Antarabangsa (IMF) hanya memberi nasihat dan bukan mengarahkan Malaysia melaksanakan sebarang langkah untuk mengatasi masalah ekonomi.

Datuk Seri Dr Mahathir Mohamad berkata, IMF adalah sebuah badan antarabangsa yang bertanggungjawab dan hanya memberi nasihat, sama ada diminta atau tidak oleh sesebuah negara.

"Saya tidak fikir kita diarahkan oleh IMF. Saya juga tidak fikir IMF memberikan ugutan jika kita tidak buat, ringgit akan jatuh lagi," kata Perdana Menteri ketika diminta mengulas kenyataan Pengarah Urusan IMF, Michel Camdessus, ketika melawat negara ini minggu lalu.

Camdessus yang memuji langkah berhemat kerajaan dalam menangani kegawatan ekonomi menyatakan kebimbangan mengenai pertumbuhan kredit yang terlalu cepat.

Beliau dengan itu menyarankan pihak berkuasa kewangan di Malaysia menaikkan kadar faedah bagi membendung pertumbuhan kredit yang keterlaluan.

Bercakap pada sidang akhbar selepas mempengerusikan mesyuarat majlis pelaksanaan projek Koridor Raya Multimedia (MSC) di Kompleks Transit Perbadanan Pembangunan Multimedia (MDC) di Cyberjaya hari ini, Dr Mahathir berkata:

"IMF sudah mengemukakan saranannya dan ini akan kita teliti."

Mengenai proses pembangunan MSC, Perdana Menteri berkata, projek itu tidak akan terjejas dalam kegawatan ekonomi kerana ia adalah inisiatif sektor swasta.

MSC yang disenaraikan sebagai projek produktif turut menerima keutamaan dalam mendapatkan pembiayaan.

(END)